

TESALONICENSES

Pablo quiain'₅₄ riin'₅₄ jmo₂₃ si₂ a₂chein₃ ne₄ Guá'₅ i₂chan₂ juig₂
Tesalónica

1 ¹Jniá₂ Pa₄, quian'₅₄ Silvano,^a quian'₅₄ Timoteo né₃, dsian'₄ jnia'₅₄
si₂ la₂ ne'₅₄ 'nia'₂ rìn'₅₄ jniog₄ i₂chan₂ juig₂ Tesalónica, 'nia'₂ dsa₂
'ei₅ caun₂ jág₁ quian'₅₄ Diú₄ Jmei₂ jniog₄, quian'₅₄ Te₁gui'₅₄ Jesucristo.
² Jui₁jme₂gu'₅₄ bá₄ Diú₄, jui₁jme₂gu'₅₄ Te₁gui'₅₄ Jesucristo né₃, jmo₃ 'ua₁
dsí₅ ja₁con'₂ 'nia'₂, jui₁'ei₅ dse₃ 'au'₂, tions'₅₄ 'ei₅ tei₄.

'É₂ Diú₄ uig₅ ja₁con₂ dsa₂ i₂le₁cán'₄ dso₄ jë₁ma₂té₂ rë₁guan'₂ táng₃
Cristo mi₂güíg₃

³ Rin'₅₄ jniog₄, ca₂le₃jé₃ jmig₄ bá₄ ca₂tág₂ jnia'₅₄ cuë'₅₄ ti₁'mag'₄ Diú₄
o₄quián'₂ 'nia'₂, ia₁ le₂jaun₂ bá₄ dse₃ dsiógs, ia₁ caun₂ dsi₂cón'₃ bá₄ 'nia'₂
a₂rë'₂éng'₂ jág₁ quió'₅ Diú₄, caun₂ jme₂'niógs' bá₄ 'nia'₂ ríng'₂ 'ñio₅ lin₃
le₂jang'₂ le₂jang'₂. ⁴ Jaun₂ lë₃, jmá'₃ lia'₂ jág₁ dse₃ bá₄ dsia₂ jnia'₅₄ 'ín₅
'nia'₂ jin₄ guá'₅ quián₅ Diú₄, 'a₂ lia'₂ ma₂ca₂tian'₃ 'nia'₂
a₂ma₂ca₂jme₁juing'₂ 'au'₂ a₂'én'₂ 'nia'₂ ne₄ ca₂le₃jé₃ a₂co₂'ein₅ dsa₂,
a₂qui₂jmógs' dsa₂ né₃. ⁵ Jaun₂ le₂në₅ cuë₅ léi₄, con'₂ dsi₂ten₅₄ bá₄ qui₂dsi₅
Diú₄ 'éi'₃, ia₁jaun₂ lén'₂ 'nia'₂ dsa₂ i₂ca₂tín'₂ dsi₁niog'₃ ja₁gon₂ Diú₄;
o₄quió'₄ a₂jaun₂ njag'₅₄ 'nia'₂ uig₅.

⁶ Ján₃ bá₄ le₂jaun₂ dsi₂ten₅₄, Diú₄ bá₄ jme₃ré₃ cué'₃ uig₅ a₂ca₂tín₂ dsa₂
i₂ma₂jmá'₂ 'nia'₂. ⁷ Jaun₂ 'nia'₂ dsa₂ i₂qui₂ma₂njag'₅₄ uig₅, Diú₄ jmo₃
a₂'ag₃ tei₄ 'au'₂ 'nia'₂, a₂'ag₃ tei₄ dsi₅ jnia'₅₄ ján₃ jë₁ma₂té₂ rë₁jñiò'₂
Te₁gui'₅₄ Jesús jui₅ guei'₅₄ i₂juíg₃ jë₄ si₂ ca₂jo'₅₄, quiain'₅₄ ángeles i₂'uan'₂
quiáin₅. ⁸ Jñiói'₂ a₂cué'₃ uig₅ dsa₂ i₂tsá₃ cuïn₅ Diú₄, ia₁ on₃ guë'₂ jui₅
ca₂tón'₃ jág₁ dse₃ quió'₅ Te₁gui'₅₄ Jesucristo. ⁹ Ca₂le₃jín₃ 'éi₂ gue₃ 'liain'₅₄
a₂dsi₃'éin₂ co₂nei'₅₄, co₂dsia₅ jñiai'₃ ne₄ Te₁gui'₅₄, dsi₃toin'₅₄ uíng₂ ja₁tsá₃
ma₃'e₂ bí₁ jlá'₁ quió'₅ Diú₄ jniá₂. ¹⁰ Jmig₄ jaun₂, jë₁ma₂té₂ rë₁guan'₂
Te₁gui'₅₄, a₂jme₃juag'₂ ca₂le₃jín₃ dsa₂ i₂'én₂ quiáin₅,^b jaun₂ dsa₂ i₂'én₂ né₃
qui₂dsi₃gó'₃ dsí₅ jág₃ jíñin₂ Te₁gui'₅₄. Ján₃ bá₄ o₁ton'₄ 'nia'₂ ja₁jaun₂, ia₁
a₂ma₂ca₂rë'₂ 'én'₂ 'nia'₂ jág₁ dsau₅ quián₂ jnia'₅₄.

¹¹ 'Uig₅₄ jaun₂ bá₄ ján₃, chi₂len'₄ jnia'₅₄ Diú₄ ca₂le₃jé₃ jmig₄ o₄quián'₂
'nia'₂, jui₁i₂nio'₄ 'nia'₂ con'₂ dsi₂ten₅₄ i₃nio₄ dsa₂ i₂ma₂té'₃ quiáin₅;
jui₁jme₂ti₃ të₂le₃ quian'₅₄ bí₂ quió'₅ ca₂le₃jé₃ a₂dse₃ a₂'ñio₂ 'au'₂ 'nia'₂
jmó'₂, quian'₅₄ ca₂le₃jé₃ ta₁ a₂jmo'₂ 'nia'₂ ia₁ a₂'éng'₂. ¹² Jaun₂ le₂në₅ bá₄
lé₂ le₃juín₂ Te₁gui'₅₄ Jesucristo quián₂ ja₁con'₂ 'nia'₂, ján₃ bá₄ le₂jaun₂

^a1 Lia'₂ chen₂ Silvano, co₂rë₂ quian'₅₄ Silas.

^b10 lit. "dsa₂ jñiío₅ quiáin₅."

'nia'₂ ja₁con₂ 'éi₂, lia'₂ con'₂ lē₅ a₂'ua₁ dsí₅ Diú₄ quian'₅₄ Te₁gui'₅₄
Jesucristo.

Le₃jniá₂ jan₂ dsa₂ i₂tsá₃ 'e₂ 'éi'₃ gó'₅

2 ¹ Jaun₂ nē₃, 'nia'₂ rin'₅₄ jniog₄, jui₁lia'₂ jé₁ma₂té₂ rë₂guan'₂
Te₁gui'₅₄ Jesucristo, jé₁ma₂té₂ rë₁tió'₄ lo'₂ quiain'₅₄, mi₂ jnia'₅₄
chei₂ 'nia'₂, rin'₅₄ jniog₄, ² a₂tsá₃ caun₂ lë₁jme₁tsín₄ 'nia'₂ a₂dsí₃jig₅ 'au'₂
le₂siá'₂, on₃ guë'₂ can₂ 'nia'₂ go₂'i₃, në₁'e₂ gué'₃ jág₁ a₂já₅ të₂le₃ quian'₅₄
jan₂ jme₂dsí₂, on₃ guë'₂ jág₁ a₂dsia₅ dsa₂, on₃ guë'₂ në₁'e₂ si₂ carta
a₂chen₅ dsa₂ ne'₅₄ 'nia'₂ në₂jag₄ bá₄ a₂jmo₂ jnia'₅₄, jé₁juá'₂ dsa₂
a₂ma₂ca₂té₂^c jmid₄ quió'₅ Te₁gui'₅₄. ³ Tsá₃ lë₁cuín₅ 'nia'₂ jmid₄ a₂jme₃gau₅
dsa₂. Ia₁ nē'₃ a₂te₅₄ jmid₄ jaun₂, jmo₃ dsa₂ caun₂ jág₁ a₂jme₃ jniai₅₄ Diú₄,
jaun₂ le₃jniá₂ jan₂ dsa₂ i₂tsá₃ 'e₂ 'éi'₃ gó'₅ 'i₁caun₂, i₂ma₂'i₄ 'éi'₃ dsí₃'én₂.
⁴ Dsa₂ 'éi₂ náu₃ quein₅ ne₄ ca₂le₃jé₃ a₂jmo₅ dsa₂ dsí₅ lín₅ Diú₄, o₃
a₂jme₂juag'₂ dsa₂ 'e₂. Ca₂lia'₂ dsiog₄ guá₃ të₂ dsí₂néi₂ guá'₅ templo quió'₅
Diú₄, a₂jmo₂₃ lín₅ Diú₄.

⁵ ¿Tsa₁ dsá₂ 'au'₂ 'nia'₂, lia'₂ con'₂ jme₁eng₅₄ gué'₄ quian'₅₄ 'nia'₂,
ca₂juá'₃ jniá₂ le₃jé₃ a₂në₅? ⁶ Jaun₂ nē₃ ma₂jni₅₄ bá₄ 'nia'₂ 'ein₂ 'éi₂ i₂jné₅
jui₅, jaun₂ tsá₃ jme₃jniog₂₃ jniá₅ nē'₃ a₂té₅₄ jmid₄ quió'₅. ⁷ La₁ tion₅₄ bá₄
ma₂jmo₅ i₂'lin'₅₄ 'éi₂ bí₂ rë₂'ma₄ quió'₅ ia₁jaun₂ tsá₃ le₃jí₅₄ dsa₂ 'éi'₃
quió'₅ Diú₄. Jnía'₅₄ lia'₂ chi₁jnia₂₃ a₂jnia'₃ i₂chén'₅ dsi₂jo₂ i₂jmo₅ jnág₅
jui₅. ⁸ Jaun₂ gué'₄ jme₃jniá₅ dsa₂ 'lin'₅₄ 'éi₂. Jaun₂ Te₁gui'₅₄ Jesús nē'₃
jñag'₃ quian'₅₄ dsí₂ tio'₅₄ 'o₅₄, 'ein₂ 'éi₂ quian'₅₄ a₂co₂tág₅ co₂'né'₅ quió'₅
nē'₃ jé₁jniói'₂. ⁹ Satanás bá₄ jmo₃ jiá₃ dsa₂ 'lin'₅₄ 'éi₂, ia₁ guáin₂ ján₃
quian₅ bí₂ a₂o₂dsain₂ jmo₃ léi₄ jué'₂ jme₃gau₂₃. ¹⁰ Ca₂le₃jé₃ ne₅₄ cosa
'lig'₅₄ jmo₃ a₂jme₃gain₂₃ dsa₂ i₂tion'₅₄ jui₅ dsí₃'én₂ ia₁ tsá₃ gué'₂
ca₂rë₃'nio₃ gue₃ jág₁ tí₅ dsón'₂ a₂jme₁lió₂. ¹¹ Jaun₂ bá₄ lë₃ cuë₃ Diú₄ jmid₄
a₂le₃gain₂, ia₁jaun₂ jui₁le₂'ein₂ co₂nei'₅₄ jág₁ të₂jág₁, ¹² ia₁jaun₂ 'é₂ Diú₄
uig₅ quió'₅ ca₂le₃jí₃ ia₁ tsá₃ gué'₂ ca₂rë₃'ein₂ jág₁ tí₅ dsón'₂, ia₁ ja₂lín₃
gué'₄ të₅ dsí₅ cosa 'lig'₅₄.

Dsa₂ i₂ma₂quion'₅₄ quián₅ Diú₄

¹³ La₁ jnia'₅₄ nē₃, ca₂le₃jé₃ jmid₄ bá₄ cuë₂ ti₁'mag'₄ Diú₄ o₄quián'₂ 'nia'₂,
rin'₅₄ jniog₄, i₂'nió₄ quián₅ Te₁gui'₅₄. Jaun₂ lë₃ lia'₂ con'₂ jme₁ca₂rë₃lió₃
jmid₄ bá₄ ca₂quión'₂ Diú₄ 'nia'₂ ia₁jaun₂ tín'₄ 'nia'₂, lén'₂ 'nia'₂ dsa₂
i₂le₁jé₃ të₂dsí₅ të₂le₃ quian'₅₄ Jme₂dsí₂ quián₅ Diú₄, të₂le₃ quian'₅₄ jág₁
dsau₅ a₂ma₂'én'₂ 'nia'₂ nē₃. ¹⁴ Ta₁ jaun₂ ca₂té₃ Diú₄ 'nia'₂ të₂le₃ quian'₅₄
jág₁ dse₃ a₂ca₂jme₁tag₅ jnia'₅₄, ia₁jaun₂ dsí₁nó'₅ 'nia'₂ quen'₅₄ quiang'₅₄
a₂jlá'₁ a₂lín₅ Te₁gui'₅₄ Jesucristo quián₂ jniog₄.

¹⁵ Jaun₂ le₂në₅, rin'₅₄ jniog₄, caun₂ 'éi₂ 'nia'₂ 'au'₂, chan'₂ tiá₂ jág₁, tsá₃
jui₁dsí₂'én₂ 'au'₂ 'nia'₂ jág₁ a₂qui₂ma₂cué₁ jnia'₅₄, lia'₂ jág₁ quian'₅₄ si₂

^c2 o₃, "a₂ma₂ja₂quián₃."

cartas né₃. ¹⁶ Jaun₂ 'ñiog₅ Te₁gui'₅₄ Jesucristo quian'₅₄ Diú₄ Jmei₂ jniog₄, i₂ma₂jmo₃ 'ua₁ dsí₅ 'nio₃ jniog₄, cuë₂₃ lián'₂ co₂tan₅₄, cuë₂₃ a₂'ín₂ dsí₅ jniog₄ tág'₄ né₃, ¹⁷ jui₁cué'₄ bí₂ të₂'au'₂ 'nia'₂ ia₁jaun₂ caun₂ bá₄ 'ag₃ 'au'₂ 'nia'₂, jë₁dsiá'₁ jág₁, jë₁jmó'₂ 'nia'₂ ca₂le₃jé₃ ne₅₄ a₂dse₃.

Chi₁len'₄ 'nia'₂ Diú₄ o₄quián₂ jnia'₅₄

3 ¹ Jë₁ca₂tó'₂ rín'₅₄ jniog₄, chi₁len'₄ 'nia'₂ Diú₄ o₄quián₂ jnia'₅₄, ia₁jaun₂ ma₂né₃ cón'₅ dsióg₄ jág₁ dse₃ quió'₅ Te₁gui'₅₄ ca₂le₃jé₃ juig₂. Jui₁gue₅₄ bá₄ dsa₂ 'ñio₂ dsí₅ jui₁jme₂jué'₂ bá₄ dsa₂ jág₁ la₂ jui₁lia'₂ ca₂lë₃ quian'₅₄ 'nia'₂. ² Mi₄ 'nia'₂ o₄quián₂ jnia'₅₄ ján₃, ia₁jaun₂ lió₂ jnia'₅₄ o₄gú₃ dsa₂ 'lin'₅₄ i₂jmóg'₂ mi'₅₄, ia₁ tsá₃ 'én₂ ca₂le₃jín₃. ³ La₁ tí₅ bá₄ jág₁ quió'₅ Te₁gui'₅₄ quián₂ 'nia'₂. Jmo₃ bá₄ 'ag₃ caun₂ 'au'₂ 'nia'₂ qui₂jmo₃ 'í₁, ia₁jaun₂ tsá₃ jmóg'₂ i₂së₃dsen₃. ⁴ Caun₂ bá₄ 'ei₅ dsí₅ jnia'₅₄ të₂le₃ quió'₅ Te₁qui'₅₄, a₂jmo'₂ ton'₂ a₂jmó'₂ 'nia'₂ né₃, ca₂le₃jé₃ 'e₂ a₂ma₂jua'₂ jnia'₅₄ jmó'₂ 'nia'₂. ⁵ Jui₁jiog₅₄ bá₄ Te₁gui'₅₄ të₂'au'₂ 'nia'₂ ja₁'nio₃ Diú₄, ja₁jme₁juin'₂ 'nia'₂ 'au'₂ jui₁lia'₂ juin'₂ dsí₅ Cristo né₃.

Ca₂tín₂ bá₄ dsa₂ jmo₃ ta₁

⁶ Rín'₅₄ jniog₄, cuë₂ jnia'₅₄ 'éi'₃ të₂le₃ o₄quió'₄ Te₁gui'₅₄ Jesucristo, jmo₄ 'nia'₄ cau₅ jui₁'ein₂ gué₃ rín'₅₄ jniog₄ juín'₅ jmo₃ ta₁ on₃ gué'₂ jmo₂₃ con'₂ lë₅ a₂ca₂jme₁tin₅ jnia'₅₄ 'nia'₂. ⁷ Jaun₂ ñi'₅₄ bá₄ 'nia'₂ 'a₂ lia'₂ 'nió'₅ tiáng'₄ a₂jmó'₂ con'₂ lë₅ 'a₂ lia'₂ chong₂ jnia'₅₄. Tsá₃ jua'₅₄ a₂tsá₃ ca₂jmó₁ jnia'₅₄ ta₁ të₁lia'₂ ca₂tió'₄ quian'₅₄ 'nia'₂, ⁸ on₃ gué'₂ jua'₅₄ ca₂que₅₄ jnia'₅₄ a₂lë₁ca₂que₅₄ quió'₅ rín'₅₄, jua'₅₄ tsá₃ ca₂qui₅₄. Të₂le₃ qui₂ca₂jmó₁ bá₄ jnia'₅₄ ta₁ 'ñio₅ lín₃ lia'₂ 'uë₂jmi₂ ia₁jaun₂ tsá₃ cán'₁ 'nia'₂ guei₂ o₄quián₂ jnia'₅₄. ⁹ On₃hua'₅₄ ia₁ a₂tsá₃ ca₂tág₂ jnia'₅₄; a₂jnia'₅₄ lia'₂ ca₂quián₁ jnia'₅₄ caun₂ jui₅ ne₄ 'nia'₂, ia₁jaun₂ 'nia'₂ né₃ cán'₁ jui₅ jaun₂ a₂ca₂quián₁ jnia'₅₄. ¹⁰ Ia₁ lia'₂ con'₂ jme₁tio'₅₄ jnia'₅₄ quian'₅₄ 'nia'₂, ca₂cué₁ 'éi'₃ la₂: Jui₁lia'₂ dsa₂ i₂juín'₅ jmo₃ ta₁, tsá₃ jui₁gué'₄. ¹¹ Ma₂ne₄ jnia'₅₄ dsia₅ dsa₂ tság₅ jnia'₅₄, chan₂ 'nia'₂ i₂lín₅₄ tián'₅ tsá₃ ta₁ 'nio₃ jmo₃, 'ñio₅ bá₄ tsá₃ jiin₅₄ qui₂tiáin₂ ja₁tsá₃ ca₂tín₂. ¹² Jaun₂ dsa₂ 'éi₂ né₃ chei₂ jnia'₅₄ le₃quió'₅ Te₁gui'₅₄ Jesucristo quián₂, jui₁jmo₁₂ ta₁ quió'₅ ia₁jaun₂ cha₂ a₂qui₂dsí₃ñíí₂.

¹³ Rín'₅₄ jniog₄, tsá₃ jmo₂ 'nia'₂ a₂ca₂'ong'₃ jmo'₂ cosa dse₃. ¹⁴ Chi₂jua'₂ chan₂ i₂tsá₃ tón'₂ jui₅ a₂jua'₂ jnia'₅₄ ne₄ si₂ la₂, jag₄ 'nia'₂ 'ein₂ 'éi₂ jaun₂ tsá₃ ma₂jme₁quiain'₅₄ 'nia'₂, ia₁jaun₂ le₃gui'₅₄. ¹⁵ La₁ tsá₃ jme₁'ñiai'₅₄ 'nia'₂, të₂le₃ cué'₅₄ tioin'₂ 'nia'₂ jág₁ dse₃ co₂'nió'₄ ríng'₂.

Jui₁jme₂gu'₅₄ bá₄ Diú₄: Jág₁ jë₁ca₂tó'₂ quió'₅ Pa₄

¹⁶ 'Niom₅ Te₁gui'₅₄ i₂jmo₅ 'ag₅ tei₄ dsí₅ dsa₂, jui₁jmo₁₂ le₁'ág₄ tei₄ 'au'₂ 'nia'₂ quian'₅₄ ca₂le₃jé₃ a₂jmó'₂ 'nia'₂. Jui₁'en₅₄ bá₄ Diú₄ quian'₅₄ ca₂le₃jín'₃ 'nia'₂.

¹⁷ Jniá₂ Pa₄ jmo₂₃ si₂ la₂ quian'₅₄ gu₃^d cuíng₅ Diú₄ 'nia'₂, co₂'nió'₄ léi₄ a₂tó'₅ jniá₂ ne₄ ca₂le₃jé₃ si₂ a₂jmo₂₃. Le₂la₂ lé₅ letra quió₃. ¹⁸ Juí₁jme₂gu'₅₄ Te₁gui'₅₄ Jesucristo quián₂ jniog₄ ca₂le₃jín'₃ 'nia'₂.
Co₂në₅.

^d**17** 'Nio'₂ ja₁ton₅ 1 Corintios 16:21; Gálatas 6:11; Colosenses 4:18; Filemón 19.